

五礼通考

第五
十一
册

五禮通考卷第一百二十一

內廷供奉禮部右侍郎金匱秦蕙田編輯

兩淮都轉鹽運使德承盧見曾

參校

李太僕總督蘇都禦柯城方觀承同訂

直隸按察司副使元和宋崇元

吉禮一百二十一

祀孔子

春秋哀公十六年左氏傳夏四月己丑孔丘卒

注仲尼既告老去位猶書

卒者魯之君臣崇其聖德殊而異之四月十八日乙丑無己丑己丑五月十二日日月必有誤

公誄之曰旻天不弔不

愁遺一老俾屏余一人在位煢煢余在疚嗚呼哀哉尼

父無自律

注愁且也屏蔽也律法也言喪尼父無以自為法

疏鄭眾曰誄謂積累生時德行以賜之命主為其辭鄭元禮記註云誄累也累

列生時行迹讀之以作誄此傳惟說誄辭不言作誄傳記羣書傳無稱焉至漢王莽蓋惟誄其美行示已傷悼之情而賜之命耳不為之誄故書傳無稱焉至漢王莽輔政尊尚儒術封孔子後為褒成侯追諡孔子為褒成宣尼君明是舊無諡也鄭元禮註云尼父因其字以為之諡謂諡孔父為尼父鄭元錯讀左傳云以字為諡遂復妄為此解

禮記檀弓魯哀公誄孔丘曰天不遺耆老莫相予位焉

鳴呼哀哉尼父

注誄其行以爲諡也言孔子死無佐助我處位者尼父因其字以爲之諡

吳氏澄曰誄者述其功行以哀之之詞如後世祭文之類非諡也

欽定義疏有誄而不諡者如哀公之誄尼父是也有誄而諡者如衛之諡貞惠文子是也諡必兼誄而誄不必兼諡鄭謂誄其行以爲諡似未必然

史記孔子世家孔子葬魯城北泗上

皇覽曰孔子冢去城一里冢塋百畝冢南北廣十步

東西十三步高一丈二尺冢前以飯甑爲祠壇方六尺與地平本無祠堂冢塋中樹以百數皆異種魯人世世無能名其樹者民傳言孔子弟子異國人各持其方樹來種之其樹作粉維離女貞五味篋檀之樹孔子塋中不生荆棘及刺人草弟子及魯人往從冢而冢者

百有餘室因命曰孔里魯世世相傳以歲時奉祠孔子冢而諸儒亦講禮鄉飲大射于孔子冢孔子冢大一頃

故所居堂弟子內後世因廟藏孔子衣冠琴車書

索隱曰謂孔子

所居之室其弟子之中孔子沒後後代因廟藏夫子平生衣冠琴書於壽堂中

至於漢二百餘年不絕高皇

帝過魯以太牢祠焉諸侯卿相至常先謁然後從政

太史公曰詩有之高山仰止景行行止雖不能至然心鄉往之余讀孔氏書想見其爲人適魯觀仲尼廟堂車服禮器諸生以時習禮其家余低回留之不能去云天下君王至於賢人眾矣當時則榮沒則已焉孔子布衣傳十餘世學者宗之自天子王侯中國言六藝者折中於夫子可謂至聖矣

右周

漢書高祖本紀十二年十一月行自淮南還過魯以太牢祀孔子

邱氏濬曰此漢以來祀孔子之始

晉書禮志晉武王入殷未及下車而封先代之後蓋追思其德也孔子以大聖而終於陪臣未有封爵至漢元帝孔霸以帝師賜爵號褒成君奉孔子後

漢書儒林傳元帝卽位徵霸以帝師賜爵關內侯食邑八百戶號褒成君

史記孔子世家正義括地志云漢封夫子十二代孫忠爲褒成侯生光爲丞相封侯平帝封孔霸孫莽二千戶爲褒成侯後漢封十七代孫志爲褒成侯魏封二十二代孫羨爲崇聖侯晉封二十三代孫震爲奉聖亭侯後魏封二十七代孫爲崇聖大夫孝文帝又封三十一代孫珍爲崇聖侯高齊改封珍爲恭聖侯周武帝改封鄒國公隋文帝仍舊封鄒國公煬帝改爲紹聖侯皇唐給復二千戶封孔子裔孫孔德倫爲褒聖侯也

成帝本紀綏和元年二月癸丑詔曰蓋聞王者必存二王之後所以通三統也昔成湯受命列爲三代而祭祀

廢絕考求其後莫正孔吉其封吉爲殷紹嘉侯三月進爵爲公及周承休侯皆爲公地各百里

文獻通考梅福上書曰武王克殷未及下車存五帝之後封殷於宋紹夏於杞明著三統示不獨有也是以姬姓半天下遷廟之主流出於戶所謂存人以自立者也今成湯不祀殷人無後陛下繼嗣久微殆爲此也春秋經曰宋殺其大夫穀梁傳曰其不稱名姓以其在祖位尊之也此言孔子故殷後也雖不正統封其子孫以爲殷後禮亦宜之何者諸侯尊宗聖庶奪適傳曰賢者子孫宜有土而況聖人又殷之後哉昔成王以諸侯禮葬周公而皇天動威雷風著災今仲尼之廟不出闕里孔氏子孫不免編戶以聖人而歆匹夫之祀非皇天之意也今陛下誠能據仲尼之

素功以封其子孫則國家必獲其福又陛下之名與
天亡極何者追聖人素功封其子孫未有法也後聖
必以爲則不滅之名可不勉哉福孤遠又譏切王氏
故終不見納初武帝時封周後姬嘉爲周子南君至
元帝時尊周子南君爲周承休侯位次諸侯王使諸
大夫博士求殷後分散爲十餘姓郡國往往得其大
家推求子孫絕不能紀時匡衡議以爲王者存二王
後所以尊其先王而通三統也其犯誅絕之罪者絕
而更封他親爲始封君上承其王者之始祖春秋之
義諸侯不能守其社稷者絕今宋國已不守其統而
失國矣則宜更立殷後爲始封君而上承湯統非當
繼宋之絕侯也宜明得殷後而已今之故宋推求其
嫡久遠不可得雖得其嫡嫡之先已絕不當得立禮

記孔子曰丘殷人也先師所共傳宜以孔子世爲湯
後上以其語不經遂見寢至成帝時梅福復言宜封
孔子後以奉湯祀綏和元年立二王後推迹古文以
左氏穀梁世本禮記相明遂下詔封孔子世爲殷紹
嘉公

蕙田案紹嘉侯之封雖曰繼殷之後其實亦
是奉孔子也觀梅福之言曰今陛下誠能據
仲尼之素功以封其子孫則國家必獲其福
匡衡之言曰禮記孔子曰某殷人也先師所
共傳宜以孔子世爲湯後意可知也故文獻
通考載之於褒贈先聖先師門內而愚於是
編亦附其內云

平帝本紀元始元年封孔子後孔均爲褒成侯奉其祀

追謚孔子曰褒成宣尼公

邱氏濬曰案此後世尊崇孔子之始夫平帝之世政出王莽姦偽之徒假崇儒之名以收譽望文姦謀聖人在天之靈其不之受也必矣有若曰自生民以來未有盛於夫子者也豈一言一行之美而可以節惠立謚者哉然則不加以謚號將何以稱曰千萬世之下惟曰先師孔子以見聖人所以爲萬世尊崇者在道不在爵位名稱也

後漢書鍾離意傳注意別傳曰意爲魯相到官出私錢萬叁千文付戶曹孔詡修夫子車身入廟拭几席劒履男子張伯除堂下草土中得玉璧七枚伯懷其一以六枚白意意令主簿安置几前孔子教授堂下床首有懸甕意召孔詡問此何甕也對曰夫子甕也背有丹書人莫敢發也意曰夫子聖人所以遺甕欲以懸示後賢因發之得素書文曰後世修吾書董仲舒護吾車拭吾履發吾筭會稽鍾離意璧有七張伯藏其一意卽召伯問果服焉

右漢

後漢書世祖本紀建武五年二月壬申封殷後孔安爲

殷紹嘉公

注成帝封孔吉爲紹嘉公安即吉之裔也

冬十月還幸魯使大司空祠孔子

蕙田案此遣官祀闕里之始

十三年二月庚午以殷紹嘉公孔安爲宋公

十四年夏四月辛巳封孔子後志爲褒成侯

注平帝封孔均爲褒成侯志均

也子

馬氏端臨曰西漢時孔氏之裔侯者二人紹嘉侯奉

殷後也褒成侯奉孔子之後也建武中興襲爵如故

紹嘉之後不知所終褒成之後則志卒子損嗣至和

帝永元四年徙封褒尊侯損卒子曜嗣曜卒子元嗣

相傳至獻帝初國絕魏時再襲封世世不絕

明帝本紀永平十五年三月幸孔子宅祠仲尼及七十二弟子親御講堂命皇太子諸王說經

注漢春秋曰帝時升廟立羣臣中庭北面皆再拜帝進爵而後坐

冊府元龜永平十五年帝東巡過魯幸孔子宅祠仲尼及七十二弟子親御講堂命皇太子諸王說經帝自制五經要說章句令桓郁較定於宣明殿其後帝親於辟雍自講所著五行章句已復令郁說一篇帝謂郁曰我爲孔子卿爲子夏起予者商也又問郁曰子幾人能傳學郁曰臣子皆未能傳學孤兄子一人學方起帝曰努力教之有起者卽白之

邱氏濬曰此後世祀孔子弟子之始

章帝本紀元和二年二月丙辰東巡守三月己丑進幸

魯庚寅祀孔子於闕里及七十二弟子賜褒成侯及諸孔男女帛

東觀書曰祠禮畢命儒者論難

孔僖傳元和二年二月帝東巡守還過魯幸闕里以太牢祀孔子及七十二人作六代之樂大會孔氏男子二十以上者命儒者講論語僖自陳謝帝曰今日之會於卿宗乎對曰臣聞明王聖主莫不尊師貴道今陛下親屈萬乘辱臨敝里此乃崇禮先師增輝聖德至於光榮非所敢承帝笑曰非聖者子孫焉有斯言乎遂拜僖郎中賜褒成侯損及孔氏男女錢帛安帝本紀延光三年春二月東巡守三月戊戌祀孔子及七十二弟子於闕里自魯相令丞尉及孔氏親屬婦女諸生悉會賜褒成侯以下帛各有差

闕里志元嘉二年詔孔子廟置百石卒史一人掌領禮器春秋享禮出王家錢給犬酒值河南尹給牛羊豕各一大司農給米

後漢置百石卒史詔碑司徒臣雄司空臣戒稽首言魯前相瑛書言詔書崇聖道勉六藝孔子作春秋制孝經刪述五經演易繫辭經緯天地幽贊神明故特立廟褒成侯四時來祠事已卽去廟有禮器無常人掌領請置百石卒史一人典主守廟春秋饗禮財出王家錢給犬酒直須報謹問太常祠曹掾馮牟史郭元辭對故事辟雍禮未行祠先聖師侍祠者孔子子孫太宰太祝令各一人皆備爵太常丞監祠河南尹給牛羊豕雞口口各一大司農給米祠臣愚以爲宜

如

大聖則象乾坤爲漢制作先世所尊祠

用眾牲長吏備爵今欲加寵子孫敬恭明祀傳于罔
極可許臣請魯相爲孔子廟置百石卒史一人掌領
禮器出王家錢給犬酒直他如故事臣雄臣戒愚戇
誠惶誠恐頓首頓首死罪死罪臣稽首以聞制曰可
元嘉三年三月廿七日壬寅司徒雄司空戒下魯相
承書從事下當用者選年卅以上經通一藝雜試通
利能奉弘先聖之禮爲宗所歸者如詔書書到言永
興元年六月甲辰朔十八日辛酉魯相平行長史事
卜守長擅叩頭死罪敢言之司徒司空府壬寅詔書
爲孔子廟置百石卒史一人掌主禮器選年卅以上
經通一藝雜試能奉弘先聖之禮爲宗所歸者平叩
頭叩頭死罪死罪謹案文書守文學掾魯孔龢師孔
憲戶曹史孔覽等雜試龢脩春秋嚴氏經通高第事

親至孝能奉先聖之禮爲宗所歸除龢補名狀如牒
平惶恐叩頭死罪上司空府讚曰巍巍大聖赫赫彌
章相乙瑛字少卿平原高唐人令鮑疊字文公上黨
屯留人政教稽古若重規矩乙君察舉守宅除吏孔
子十九世孫麟廉請置百石卒史一人鮑君造作百
石吏舍功垂無窮於是始

靈帝建甯二年詔祀孔子依社稷出王家穀春秋行禮
魯相史晨奏出王家穀祀夫子碑建甯二年三月癸
卯朔七日巳酉魯相臣晨長史臣謙頓首死罪上言
臣蒙厚恩受任符守得在奎婁周孔舊寓不能闡弘
德政恢崇一變夙夜憂怖累息屏營臣晨頓首頓首
死罪死罪臣以建甯元年到官行秋享飲酒泮宮畢
復禮孔子宅拜謁神座仰瞻櫬楨俯視几筵靈所憑

依肅肅猶存而無公出酒脯之祠臣卽自以俸錢修
上案食醎具以敘小節不敢空謁臣伏念孔子乾以
所挺西狩獲麟爲漢制作故孝經援神契曰玄丘制
命帝卯行又尙書考靈曜曰丘生倉際觸期稽度爲
赤制故作春秋以明文命綴紀撰書修定禮義臣以
爲素王稽古德亞皇代雖有褒成世享之封四時來
祭畢卽歸國臣伏見臨辟雍日祠孔子以太牢長吏
備爵所以尊先師重教化也夫封土爲社立稷而祀
皆爲百姓興利除害以祈豐穰月令祀百辟卿士有
益於民矧乃孔子玄德煥炳光於上下而本國舊居
復禮之日闕而不祀誠朝廷聖恩所宜特加臣寢息
耿耿情所思惟臣輒依社稷出王家穀春秋行禮以
供禋祀餘胙賜先生執事臣晨誠惶誠恐頓首頓首

死罪死罪上言太尉司徒司空大司農府治所部從事府昔在仲尼汁光之精大帝所挺顏母毓靈承敝遭衰黑不代倉轍環應聘歎鳳不臻自衛反魯養徒三千獲麟趣作端門見徵血書著紀黃玉韻同響應主爲漢制道審可行乃作春秋復演孝經刪定六藝象與天談鉤河擲洛卻揆未然巍巍蕩蕩與乾比崇

右東漢

三國魏志文帝本紀黃初二年春正月詔曰昔仲尼資大聖之才懷帝王之器當衰周之末無受命之運在魯衛之朝教化乎洙泗之上棲棲焉遑遑焉欲屈己以存道貶身以救世於時王公終莫能用之乃退考五代之禮修素王之事因魯史而制春秋就太師而正雅頌俾千載之後莫不宗其文以述作仰其聖以成謀茲可謂